

**APUMMIK
ILLUIKKIORNISSAMIK
ILITSERSUUSIAQ**



APUMMIK SALLILIKKIANIK PIIAANEQ



Uani takuneqarsinnaavoq
apummik sallilikkianik pīiaaffik.

Apummik illuikkiassaq apummit
pukattumit/ manngertinnikumit
pīiaaffigineqassaaq, tassa aput
anorimit manngertitaq.



Aput manngernerusoq
tikitserlugu nivanneqassaaq/
pīiaarneqassaaq. Manngertoq
tikikkaanni pīiaaffigineqalissaaq.



Sallilikkiat kipparissunngorlugit
assigiimmik sanimut ammullu
angissusilerneqassapput.



Apummit sallilikkiat pilattorlugit
piiarneqassapput. Siullermik sanimut
uuttoqqaarneqassaaq.
Sanimut 50 cm-mik silissuseqassaaq.
Pilattuut uani atorneqartoq
uuttuutigineqarsinnaavoq, nuuaniit
tigummiviata (orangiap) tungaanut
angissusilerneqassaaq.



Taava issussusissaa uuttoqneqassaaq.
Apummit sallilikkiat illuikkiap
naqqaniittussat 25 cm-tut
issussuseqassapput.
Apummit illuikkiap qaavata tungaani
atugassat 20 cm-tut issussuseqassapput.
Tassa naqqaniittut issunerussapput,
qaavatalu tungaaniittut saannerussallutik.



Kingulliullugu apummik sallilikkiap
ataatungaa pilattorneqassaaq.

ILLUIKKIORFISSAQ



Illuikkiorfissaq
toqqissunngortikannerlugu
manissaqqaarneqassaaq, tassa
toqqavissaa nivanneqassaaq
manissunngortillugu.



Illuikkiorfissap qeqqanut periarluni
qisumineq atorlugu
ammalortunngorlugu titarneqassaaq,
titarneq tassaassaaq apummik
sallilikkiat iliorarfissaat. Illuikkiassap
angissusissaa apeqqutaalluni
ammalortuliap annertussusaa
aalajangerneqassaaq.

ILLUIKKIAQ



Apummit sallilikkiaq kipparissunngorlugit piiakkat assigiimmik angissusillit atorneqassapput. Apummit sallilikkiaq titarneq malillugu iliorarneqassapput.




Imatut tulleriarlugit iliorarneqassapput.



Apummit sallilikkiaq tulliususaaq iligaanni siulianut pilattuummik/savissuarmik, nalimmassarlugu isua ilanngarneqassaaq.



Apummit sallilikkiq siulianut
attuutsillugu ajanneqassaaq.



Naammassillugu siullermik
kaajallannerani apummit sallilikkiat
iliorarneri taamatut isikkoqassapput.



Apummit sallilikkiq kingulleq ilisaq
ilanngarneqassaaq naqqata
tungaaniit, qummut isuata tungaanut
ilummut uingalaartumik assigiimmik
“manissuseqalersillugu”.



Apummit sallilikkiat kaajallannerani “akunneqarpat” sallilikkiaminermik ilallugu matussuserneqassaaq.



Akunneranut ikkussaq apummit sallilikkiap uinganera malitsiinnarlugu ammut ilanngarneqassaaq.



Kaajallallugu apummik sallilikkianik iliorakkat assigiimmik qummut “qinnikaartunngortillugu (spiral)” illuikkiaq ilusilerneqassaaq.




Naammassillugu siullermik
kaajallannerani imatut
isikkoqassaaq.



Aappasaanik qummut ilaqqinnerani,
apummit sallilikkiat naqqanisut ittunik
angissuseqassapput.



Illuikkiap qummut
alliertortinnerani
eqqaamaneqassaaq apummit
sallilikkiat ilummukanneq
uingasunnortinnissaat.



Illuikkiap
alliertortinnerani
apummit sallilikkianik
qaanut ikkussat, aviffii
naleqqatiginagit
ilineqartassapput.

ILLUIKKIAP INGERLANNERA











Siulianitut iliorluni illuikkiap qummut sananera
ingerlanneqassaaq. Kaajallannermi kingullermi apummit
sallilikkiat siuliinit mikinerullutillu aminnerussapput.



Apummit sallilikkiat
 “nipputsikkuminaappata”
 ikiorsiullugit atorneqarsinnaapput
 savimernit amitsut takisuut (soorlu
 errortanut manioraaviup atortui),
 taakku apummut sallilikkiamut
 kappusimatinneqassapput
 nippusimanageralu
 qularnarunnaarpat peerlugit.



Kingulliullugu ikkunneqassaaq illuikkiap
 “qilaava”, taanna illuikkiap
 annertussusaanut missingersorlugu
 aputiminermiit sananeqassaaq.



Illuikkiamut iserfissaq silataaniit assanneqassaaq.
 Itilaartumik ammut nivallugu aput
 piiarneqassaaq, illuikkiap iluata tungaa tikillugu.
 Inummik iserfigineqarsinnaanngorlugu
 assanneqassaaq.



Ammut assataq naammassipat "isaariaq" assiaquserneqassaaq. Sallilikkianik illuikkiornermi atorneqartut illuikkiallu sananeratut assilillugu sananeqassaaq.



Illuikkiap naammassilluni sananera

Naggataatigut apummit sallilikkiat katiternerisa ammaneri silataanit apummit matoorneqassapput.